

EFESIOS

Yi Necy Huidibi San Pablo Yajnigiejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajñibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtíp, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'.

² Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugihuip ajcxy.

Nej je Espíritu Santo conucxy Cristo yjäy

³ Tzoc iibaatim capxpaatim Dios ich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tzajpjoty.

⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinmañ, ca' ti bocy nmiid'ajtim.

⁵ Miid co Dios ooy xychojxim xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbijcim

nej yci'm y'ung, e jadu'n xymü'dadaanim tza-
ppjoty. Dios jadu'n ytuñ jadu'n nej yi' anajty
tzocyin.

⁶ Tzoc ñbaatim capxpaatim Dios ooy müd co
mijmay'ajt mij'oy'ajt tuuñ müd ñch ajt yci'xpi, co
quejxy y'ung ya naaxhuiñ müd ñch ajt nbocy
yci'xpi, jigix jëbi nyajpaatim ma yi' y'ung, je' y'ung
huidibi ooy tzocy jihuïy.

⁷ Müd co Dios ooy xychojxim xyjihuiyim paady
yci'xpi yi' y'ung ñi'py teemy yojcy co y'o'cy müd ajt
nbocy yci'xpi, ti ajt n'alma xyajnidzoocim etz nbocy
ajt ti xyhuinmeecxim. Co jadu'n ytuuñ, chi Dios
mijmay'ajt mij'oy'ajt tuuñ müd ñch ajt yci'xpi.

⁸ Co Dios jadu'n mijmay'ajt mij'oy'ajt tuñ müd
ñch ajt yci'xpi, ti xyajhuinjihuïyim ti xyajne-
jhuïyim yi yti'y'ajt yi yhuinma'ñ.

⁹ Dios yjäygidacpy jadu'n co ti xyajnejhuïyim nej
anajty müdity capxcöducy huidibi ca' pin jecy'ajty
huinjihuïy. Nañ jadu'n Dios ti xyajnejhuïyim nej
ti yhuinma'ñypidacy jecy'ajty nej ytuna'ñ anajty
müd Cristo.

¹⁰ Je huidibi Dios jecy'ajty ti yajnihuinmayïy
co tuna'ñ anajty, ytunamyb yi' mina anajty je
tiempo ti yhuaad'ajtni. Dios ti yajnihuinmayïy
anajty co pidäga'ñ tüg'óciy huidi yajpatp tza-
ppjoty etz tüg'óciy huidibi yajpatp ya naaxhuiñ
ma tüg' ane'min, e je Cristo je' ane'mamb nigo-
huajc'adamb tüg'óciy.

¹¹ Tüg'óciy tijaty tuni yjajti jii by tzajppjoty etz
ya naaxhuiñ Dios jayijp capxcödujc. ñch ajt
huidibi nyajpaatim ma Cristo, Dios ti xyhuin'ixxim
jecy'ajty co oga'n je naaxhuiñybi chondacy jigix
jëbi nbaatim tüg'óciy huidibi Dios xymöhuaanim. E

tüg'óciy jada nicxy yjaty tim jadu'n nej Dios jayijp capxcödujcy, e Dios ytumyb jadu'n nej yi' tzocy etz nej jäygidägy.

¹² Jadu'n Dios cuydumyb müid ñch ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios müid yi' ymij'ajtin etz yi' y'oy'ajtin ycixpi.

¹³ Nañ jadu'n müich ajcxy co mmidooy je ayuc tiy'ajt nej jëbi m'alma ñüdzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihuñ ymic'ajt huidibi müich ajcxy müid ma mjot mhuinmañ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuanüy jecy'ajty co xymöhuaanim.

¹⁴ Jada Dios yjihuñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'nañ yajnüdögañ pinjaty yjäy'ajtip ajcxy. Jadu'n Dios tunañ, jigix jëbi ñch ajt n'ibaatim ngapxpaatim Dios müid y'oy'ajtin ycixpi.

Pablo mibijctzoy Dios co huen ajcxy yajmoy huij'ajt cujc'ajt

¹⁵⁻¹⁶ Com ti nnejhuüyich jadu'n nej tiydudägy müich ajcxy ti mmibijccixy ñch ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüyigixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaacin ma Dios müid müich ajcxy ycixpi.

17 Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinmañ je xpijcin huidibi je Espíritu Santo yejcpy, etz nañ jadu'n xyajnejhuïhuipy xyajhuinjihuïhuipy ajcxy jac'oy yi' y'ayuc, e tüg'óciy nej yi' ti ytuuñ.

18 Dios nmibijctzooybich mïd miich ajcxy ycixpi, co xyaj'anïyïp ajcxy mjot mhuinmañ mïd yi' ytiy'ajt, jigix jëbi mnejhuïygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuïygixy nej ymijity yjanchity je pidägy huidibi Dios yegamyb mïd tüg'óciy ajcxy huidibi Dios yjäy'ajtïp.

19-20 Dios nmibijctzooybich jigix jëbi ajcxy mnejhuïhuipy jadu'n nej Dios ymic'ajt mïdity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma ïch ajt njot nhuinmañ nidüg nidüg co ajt nmibijcim. Dios ti xyajnejhuïyim yi' ymic'ajt huidibi ymïd may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jiiby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi mïd Dios.

21 Cristo jac mij'ane'min ymïd, jac mic'ajt mïd, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigï, ca'ydi jac pin huidibi cham tzinaayb, etz huidibi jacjiini tzinähuaamni.

22 Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuïy Cristo

nihuäcpejttäy tüg'óciy ane'mín. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc.

²³ Je mibijcpidijc jadu'n nipaady nej Cristo ñinicx, paady ycixpi yi' ajcxy yajcixy yajca'pxy je Cristo y'oy'ajtín ymij'ajtín. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuiyb jäy ajcxy, paady ñidzoocixy y'alma

¹ Ca'ni miich anajty ajcxy mmibijccixy Cristo, ooy anajty mdundigooygixy mïid Dios ytiy'ajt, ooy anajty ajcxy mbocymïdity, e jadu'n nipaady nej jihuiy ti m'o'ccixy mïid mbocy ajcxy ycixpi etz Dios xyajjugypijccixy huinjemy mïid jemybi jugy'ajtín.

² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjây ajcxy ytiy'ajt, etz nañ mgapxymïdoogixy anajty ajcxy je ca'oybi huïdibi ane'mb je poj naaxhuiñ, je ca'oybi huïdibi tumb ma yi jäy ajcxy yjot yhuinma'ñ huïdibi ca' capxymïdoogixy Dios.

³ Ma je tiempo tïibi ñaxy, nañ jadu'n anajty ndzinaayim jadu'n nej yi jacjadyii naaxhuiñjây ajcxy huïdibi capxymïdoob yi ca'oybi. Ngapxymïdoohuim anajty nninicx chojcín. Ndundigooyim anajty mïid ngi'mjot ngi'mhuinma'ñ. Nguipxyiyim anajty mïid yi jacjadyii naaxhuiñjây ajcxy huïdibi Dios tzaachytunaanip mïid ypocy ycixpi, etz nañ jadu'n

nmihuaad'ajtim co Dios xychaachytuunim mïid ajt nbocy ycixpi.

4-5 Oy ixypy ïch ajt mihuaadity tzaachypi mïid ajt nbocy ycixpi, per Dios mij ooy ti xypa'ayoohuim, e mij ooy ti xychojçim ti xyjihuiyim, paady ycixp tuuñ may 'ajt mïid ïch ajt ycixpi co yajjugypijcy je Cristo. E jadu'n quipxyi mïid Jesucristo ïch ajt nbaatim jemybi jugy'ajtin huïdibi ca' ycixipy ytigoyipy ni mina. Jadu'n Dios may'ajt tuuñ mïid ïch ajt ycixpi co anajty nbadaanim o'cin mïid ajt nbocy ycixpi. Mïid co Dios may'ajt oy'ajt tuuñ mïid miich ajcxy ycixpi, paady miich ajcxy ti mbatçixy jemybi jugy'ajtin huïdibi ca' ycixipy ytigoyipy ni mina.

6 Com jadu'n nipaady nej Dios xyajjugypijçim quipxy mïid Jesucristo, paady ycixp Dios xymöhuaanim it lugar jii by tzajpjoty quipxy mïid Jesucristo.

7 Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmïid'ajtim jadu'n nej Dios xychojçim xyjihuiyim etz xypa'ayoohuim mijcajee, etz mijmay'ajt mij'oy'ajt tuun mïid ïch ajt ycixpi co nyajpaatim ma Cristo.

8 Mïid co Dios miich ajcxy ti xychojçixy ti xyjihuiygixy, paady ycixp yi m'alma ajcxy ti patçixy nïdzoocin co ti nmïbijçixy Jesucristo. Ca' nmïnaanim co tijaty ti mdungixy, paady ycixp yi m'alma ajcxy ti patçixy nïdzoocin. Hue' janchtiy Dios ti xymooygixy ninigoob ajcxy m'alma nïdzoocin.

9 Ca' nmïnaanim huin'it jây ajcxy y'alma nïdzoocin paadip co oybi tungixy. Hue'janchtiy Dios jadu'n çim ti yaj'oyiy ninigoob nej jây ajcxy

jëbi patcixy y'alma ñidzoocin, jigix ca' pin jëbi huaad amij agix ñayjihuiyii.

¹⁰ Com Dios ci'm ti oyduñ ich ajt njemybi tzinaayin jugy'ajtin miid je may'ajt huidibi Cristo ytuun co y'o'cy miid ajt nbocy ycixpi. Jadu'n Dios tuuñ miid ich ajt ycixpi, jigix jëbi nduunim oyjäy'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjäy'ajtin.

Jotcuje cham n'ijtim miid Dios, com Cristo xyajpocyhuaatzim

¹¹ Jadu'n miich ajcxy ocjäymejtzcodiï nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäyity, e ni ca' miich anajty ajcxy myajtiy'ajttiïygixy nej huaad mnaydíjigixy Dios yjäy. Paady ycixp yi judíojäy ajcxy ymina'ñ co Dios je' yjäy ajcxy, e miich ajcxy ca', miid yi'da'ajty co miich ajcxy ca' myajtiy'ajttiïygixy.

¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbijccixy, etz ni ca' anajty mbadaangixy huidibi Dios y'ahuanïy ma yi judíojäy ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios.

¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy yojcy miid miich ajcxy mbocy ycixpi.

¹⁴ Jesucristo ci'm yaj'oyïy je tzip je capxy nej anajty ich ajcxy judíojäy etz miich ajcxy huidibi

ca' yjudíoájäyity naymidzip'ajtım, e cham jotcujc n'ijtim. Jesucristo ci'm yajtigoy je judíoájäy ycötujcin huídibi anajty tzipcojp capxycojp ma ñch ajcxy etz ma miich ajcxy. Jesucristo yajtügmujc judíoájäy, etz huídi ca' yjudíoájäyity.

15 Jesús mïd yci'm ninïcx yajtigoy je jecy'ajtypi cötujcin co oy yaj'ögyii cruudzcíxy. Co Jesús y'o'cy, huin'it yajtügmujcy judíoájäy etz huídibi ca' yjudíoájäyity. Huin'it oy yaj'ahuimbity tügpicy jáy jemybi huídibi Dios yjáy'ajtíp. E jadu'n ajcxy yajcixy yajmay je tzip capxy.

16 Co Cristo oy yaj'ögyii cruudzcíxy, huin'it yajcixy yajnaxxy je tzip capxy jadu'n nej yi judíoájäy anajty midzip'adyii yi' ajcxy huídibi ca' yjudíoájäyity. Etz nañ huin'it Cristo yajtügmujcy yi judíoájäy mïd huídibi ca' yjudíoájäyity. Paady ycixp Dios ycöbiga'ñyii judíoájäy ajcxy etz huídibi ajcxy ca' yjudíoájäyity agujc jotcujc.

17 Je Cristo miin anajty ya naaxhuiñ etz capx-huäcxy oybi tiy'ajt jadu'n nej jëbi ajt nbaatım jotcujc'ajtın ma Dios. Ycapxhuäcxyp anajty ma miich ajcxy huídibi ca' yjudíoájäyity, huídibi ca' anajty mïdity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ñch ajcxy judíoájäy huídibi jamïd anajty Dios ytiy'ajt.

18 Mïd co Cristo may'ajt ti tuuñ co xy'adigïyim xyjottigïyim Dios yjihuiñ ymic'ajt, paady ycixp nidüg'ócıy ñch ajt nyajpaatım ma Dios jadu'n nej tügpicy jáy, tanto judíoájäy etz nañ jadu'n huídibi ca' yjudíoájäyity.

19 Paady ycixp miich ajcxy jadachambi myaj-paady ma Dios. Jadu'n miich ajcxy myajpaady ma

Dios tım jadu'n nej je jäy ajcxy huıdibi tziıaayb ma yci'mgajp, ca' yjadu'nıty nej adzııaaybi ajcxy. Paady ycıxp tú'cıy miıch ajcxy mnaygomájtzigıxy ma Dios mııd judıójäy ajcxy. Jadu'n miıch ajcxy etz judıójäy ajcxy nıpaady cham nej jıhuıy ajcxy mdügjuugy mdügmiüg.

²⁰ Miıch ajcxy ti mmıjıııdaaccıxy je tıy'ajt huıdibi Jesús y'apóstol ajcxy ti capxhuäcxy etz je tıy'ajt huıdibi Dios y'ayucnajtzcaxıııybi ti capxhuäcxıxy. E yı' ajcxy ytıy'ajt jadu'n nıpaady nej poch'ıjx ma chondägy. E Jesucristo yı' jėdu'n yajpatp nej tüg tzaa huıdibi jaccopıcyıp ma je poch'ıjx chondägy.

²¹ Dios jadachambi tiempo ycojyp ymacxyp jadügııcy jäy huıdibi yjäy'adaanııp huıdibi tügıııp mıjıııdaaccıxy Cristo, huıdibi tú'cıy ijtcıxyp mııd Cristo. Jadu'n jadaıaabi tügııcy jäy nıpatcıxy nej tüg tıjı ma jäy ajcxy Dios ojadaıtcıxy.

²² Miıch ajcxy myajpatp ma Cristo quıpxıy mııd nidüg'ócıy yı' mayjay ajcxy huıdibi mıjıııdacp Dios etz huıdıjaty mıı'ıjtp je Espıritu Santo ma ajcxy yjot yhuınma'ñ, jadu'n miıch ajcxy mjıgy'ajtıı nıpaady nej Dios chıııaydac.

3

Pablo yı' je' mııd cötıjııı co capxhuäcxy Dios y'ayuc ma pııı ca' yjudıójäyıty

¹ Ich Pablo, nyajpatpıch puıxtıgoty mııd co nduıñıch ma Jesucristo ytung ma miıch ajcxy huıdibi ca' yjudıójäyıty. Paady ycıxp nmıııjctzooybıch Dios mııd miıch ajcxy m'oy'ajtıı ycıxpı.

² Mnejhu#yb ajcxy com Dios mijmay'ajt ti tuuñ m#d miich ajcxy yc#p#i, paady yi' ti xyajni#icyich ngapxhu#cxibich ma miich ajcxy yi y'ayuc ytiy'ajt.

³ Dios ti xyajnejhu#yich yi' ytiy'ajt hu#dibi jecy'ajty y#ch y'ijt. Jada tiy'ajt yinjaty huee#jaty #ch miich ajcxy ti nnijay#ygyxy jayijp'aty.

⁴ Co miich je necy mgapx#p, huin'it ajcxy mnejhu#hu#py co #ch nnejhu#yich je Cristo ytiy'ajt hu#dibi ijtp y#ch.

⁵ Jada tiy'ajt maabi Jesucristo, Dios ca' ni p#n yajnejhu#y jecy'ajty. Jadachambi x#i tiempo Dios m#d je Esp#ritu Santo yajnejhu#y Jesucristo ytiy'ajt je Jes#s y'ap#stoles ajcxy etz je Dios y'ayuc najtz-capx#ybi ajcxy.

⁶ Jada je' je tiy'ajt hu#dibi jecy'ajty y#ch anajty ijtp, co yi j#y ajcxy hu#dibi ca' yjud#oj#yity ypadamyb ajcxy Dios y'oy'ajt#n quipxyi m#d yi jud#oj#y ajcxy, etz na#n jadu'n yi' ajcxy yajpaady ma Dios t#'ciy m#d yi jud#oj#y ajcxy, etz na#n jadu'n yi' ajcxy padaang#xy oybi hu#dibi Dios jecy'ajty yajnimay yi jud#oj#y co m#huaang#xy p#njaty m#bijcc#xp Jesucristo.

⁷ Dios mijmay'ajt ti tu#n m#d #ch ninigoob co ti xyajni#icyich jada tung, e xym#yich mic'ajt co ngapxhu#cxibich Jesucristo y'ayuc ytiy'ajt oybi ma yi j#y ajcxy hu#dibi ca' yjud#oj#yity.

⁸ #ch jactimmudz#p ma yi maybi m#bijcp#id#jc ca'ydi jacp#n, per ca' #nejity. Dios may'ajt oy'ajt ti tuu#n ma #ch, e ti xyp#d#gyich ma yi' ytung co ngapxhu#cx#yich jada oybi tiy'ajt ma jacjadyi j#y ajcxy j#g#x j#b#i ajcxy patc#xy ma Cristo Jes#s mij'oy'ajt#n, hu#dibi ca' p#n huinj#hu#y jadu'#ny

ymijity.

⁹ Dios ti xyajñibicyich co ngapxticxibich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi müd tüg'óciy jäy ajcxy. Yi' je' Dios huidibi ti yajcojtäy tüg'óciy tijaty ya naaxhuiñ etz jiiby tzajpjoty yajpatp.

¹⁰ Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt müd, tiy'ajt padaangixy ma yi mibijcpidijc jadu'n nej Dios mijhuinma'ñ canaagnax tuñ müd jäy ajcxy nidüg'óciy huidibi mibijccixp Cristo Jesús.

¹¹ Jadu'n Dios ti cuyduuñ müd ajt nHuindzin Jesucristo jadu'n nej jecy'ajty capxcödujcy.

¹² Müd co nyajpaatim ma Jesucristo paady ycixp agujc jotcujc nmigapxim nmihuingonim Dios. Müd co nmibijcim Jesucristo paady ca' ndzigüyim ndzo'yduunim ma Dios yhuinduu.

¹³ Paady ycixp may'ajt nbijctzooyich müd miich ajcxy co ca' nigü m'ixtigihuäccixy ma ajcxy mmibijcin. Etz ca'ajcxy xyñidajipy xyñimayipyich co tzaachypi nminaxyich nyajnaxyich müd miich ajcxy ycixpi. Com müd co ti nyajnaxyich tzaachypi müd miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihu#yb jäy ajcxy

¹⁴ Com Dios mijmay'ajt ti tuuñ müd judíojäy etz müd huidibi ca' yjudíojäyity, paady njatyhuingo-jxtinaaybich Dios, ich ajt nHuindzin Jesucristo yTeedy, e nmibijctzooybich Dios müd miich ajcxy ycixpi.

15 Tüg'óciy tzajpjoty tzinaayb etz tüg'óciy naax-huiñyây huidibi mibijccixp Dios, jëbi nidüg'óciy yminaangixy: “Dios ñch ajt nDeedy.”

16 Paady nmibijctzooybich Dios Teedy mïid miich ajcxy ycixpi, co Dios je huidibi mic'ajt etz oy'ajt ymïid mijcajee, co xymöhuipy mic'ajt ma ajcxy mmibijcin mïid yi' yjihui'ñ ymic'ajt huidibi yajpatp ma ajcxy mjot mhuinma'ñ.

17 Dios nmibijctzooybich mïid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ mïid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójciixipy mjihuïygixipy mijcajee huinixi huinïtiempo je mibijcpidijc etz tüg'óciy jacjadyii jäy.

18 Nañ jadu'n Dios nmibijctzooybich mïid miich ajcxy ycixpi co miich ajcxy etz tüg'óciy mibijcpidijc mnejhuïygixipy jadu'n nej Cristo xychojcm xyjihuiyim mijcajee. E yi' chojcin yjihuiyin jadu'n nipaady nej tüg tijc huidibi jac cixip jac mijip, jac yooñip jac cïicyip ca'ydi ni huidi tijc.

19 Nmibijctzooybich Dios co xyajnejhuïygixipy xyajhuinjihuïygixipy nej Cristo xychojcm xyjihuiyim mijcajee nidüg'óciy ñch ajt, ixti ca' huaad nhuinjihuïydaayim jadu'n nej Cristo xychachchojcm xychachjihuiyim. Nmibijctzooybich Dios co xypubéjtcixip, ixti mabaad mmïid'ajttaaygixy Dios y'oy'ajtin.

20 Jadachambi, cömay Dios y'ity huidibi mic'ajt mïid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, mïid je

ymic'ajt ycixpi huidi tumb ma ñich ajt.

²¹ Huen tüg'óciy mibijcpidijc ajcxy jäymejtzcixy ojadájtciy Dios etz Cristo Jesús jabom jabom huinixi huini'tiempo. Jadu'n jada. Amén.

4

Tú'ciy n'ijtim mïd Espíritu Santo ycixpi

¹ Nyajpatpich pujxtigoty mïd ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzinaaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy.

² Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ájtigixy, jigix ñiguëxigip co mnaychójcigixy mnayjihuiyigixy miñ xyipy.

³ Mïd'adipy ajcxy mjot mhuinma'ñ tú'ciy mïd je Espíritu Santo ypubejtin jigix jëbi mdzinaaygixy jotcujc ca' ma tzip capxy.

⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njipp'ijxtaayim je oybi huidibi nbadaanim jiiby tzajpjoty.

⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nnibejtim mïd Jesucristo yxi.

⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi

may'ajt tumb m̄id nidüg'óciy ajcxy, etz yí' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ m̄id nidüg nidüg ñch ajt co Cristo xymooyim mic'ajt, jigix jēbi nidüg nidüg tuunipy Dios ytung nej ypadyi.

⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiyy tzajpjoty, chi ym̄idpättigiyy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc yminañ co je Cristo ypättigiyy tzajpjoty? Hue' je' jadu'n yminañ m̄id co je Cristo jayjip ycidacy etz ooy ayooy ya naax-huiñgixy.

¹⁰ Je Cristo yí' je' huídibi cidaac ya naaxhuiñ choñ tzajpjoty, nañ jadu'n ypättigiyy jadüg'oc tzajpjoty jactim'o'c'am. E yí' je' ymic'ajt yajpatp ma tüg'óciy huídijaty jiiby tzajpjoty etz tüg'óciy huídijaty ya naaxhuiñ.

¹¹ Je Cristo ymooygixyp nidüg nidüg yí' ytumbi mic'ajt. Nijējity mooygixy mic'ajt jēbi nidiy'ajt'ajtigixy co je' je' je Cristo. Nijējity mooygixy mic'ajt jēbi najtzcaxhūygixy Dios y'ayuc. Nijējity mooygixy mic'ajt jēbi capxhuācxixy yí' y'ayuc. Nijējity mooygixy mic'ajt jēbi capxhuicixy yí' mibijcpidijc m̄id Dios ytiy'ajt. Nijējity mooygixy mic'ajt jēbi yaj'ixpijccixy Dios ytiy'ajt.

¹² E jadu'n je Cristo mic'ajt moydaaygixy yí' yjäy, e jadu'n yajni'ixiydaaygixy m̄id ytung ycixpi. E m̄id yí' ajcxy ytung yjacyujcpedipy yí' mibijcpidijc y'ixpijcin, ixti mabaad jac m̄id'adipy ajcxy Cristo y'oy'ajtin.

13 Jadu'n Cristo mic'ajt xymooyim, jigix jëbi nidüg'óciy ñch ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy.

14 Ca' n'idaanim mïd ajt nhuinma'ñ nej pi'ctijc yhuinma'ñ ymïdity. Je pi'ctijc ajcxy janam jadojic yhuinma'ñ ytigajzcixy. Jadu'n ajcxy nipaady nej je miy huidibi je poj yajpojmiyib yajpojxiipy. Co cixy ca'pxy nmïd'ajtim Cristo ytiy'ajt, ca' pinjaty xyhuin'inim mïd huing ayuc oymibijcniip huidibi ca' yjanchity.

15 Hue' janchtiy ngapxim je tiy'ajt tiybi mïd tzojcin jihuïyin, jaydëbi njacyeecim ajt nmibijcin etz njacnejhuïyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigo-huajc'ajtp tüg'óciy mibijcpidijc.

16 Cristo etz je mibijcpidijc nipatp nej tüg ninïcx. Cristo ñipatp nej je ninïcx cohujc huidibi ane'mb etz mic'ajt mooyb je ninïcx. Etz yi mibijcpidijc ñipatp ajcxy nej je ninïcx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügïyip ajcxy ymibijcin etz nañ jadu'n yaj'ijtigixy tüg mucy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyi. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yjihuïyin mïd ymigügtijc.

Je jemybi jugy'ajt huidibi nbaatim ma Cristo

17 Paady ycixp nnimäyich miich ajcxy etz nya-jnibijccixy mïd ajt nhuindzin Jesucristo ycötujcin,

co ca' huaad mdungixy loci huinma'ñ huídibi ca' choubaady ma Dios, jadu'n nej jacjadyii jäy ytungixy huídibi ca' miǰpidaaccixy ajt nHuindzin Jesucristo.

18 Ca' huaad mdzinaaygixy jadu'n nej jacjadyii jäy ajcxy chinäy müd loci huinma'ñ. Ca' ajcxy yajpaady ma Dios, je huídibi jugy'ajtín yejcp huinixibi. Ooy ajcxy yotjuuñity, ca' ajcxy ixpigaangixy Cristo ytiy'ajt.

19 Ca' ajcxy ti tzo'ydu'n jihuüy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'ócixy tijaty jibic-huinma'ñ.

20 Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt,

21 pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huídibi yajpatp ma Cristo.

22 Ti miich ajcxy m'ixpicy co copicy m'ixmájtzcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müd je jibicpi huídibi anajty ajcxy mnijot'ajtcixyp, ci'm anajty mnayhuin'ünigixy.

23 Ixmájtzcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi.

24 Müd'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müd tudägy'ajtín etz huädz'ajtín.

25 Paady ycixp ca'huaad m'ñndaaccixy, nidüg nidüg cápxcix huidibi janchip mñd migügtjç, mñd co quipxyjaty nyajpaatim ma Jesucristo.

26 Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydgóoygixipy yi mjotmädi yajjip ca'ni anajty xi ycidacyñi.

27 Ca' mnayyéjçigixy ma je mujcu' co je mujcu' xymimadägipy.

28 Yi jäy ajcxy huidibi meetzcixp, huen ixmajtzcixy meedzi, etz ijxtähuiipy ytung. Co ytunipy ma ci'ndung jëbi pubedipy ajcxy ymigügtjç huidibi yajmayjajtcixp tijaty.

29 Ca' mgápxcixipy jibic ayuc. Cápxcix oy ayuc huidibi jëbi migüg ajcxy jäygi daaccixy, huidibi pubejtp etz yajyeegy je mibjcin, huidibi yejcp oy'ajtin ma pin ajcxy amido'ijtp.

30 Ca' huaad mgapxcixy mmiydaaccixy ayuc huidibi yajjotmaybijcp je Espíritu Santo huidibi Dios yjë'ajtpy. Je Espíritu Santo huidibi miich ajcxy mñd ma mjot mhuinma'ñ, yi' je' huidibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuiñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyipy ni mina.

31 Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihuiygixy, jadu'n nej co tzojç mjotma'tcootcixy, jadu'n nej co mnaymijotmá'tigixy, jadu'n nej co mnayhuin'ójigixy nayjip'ójigixy. Ca' huaad mmigüg mnigapxcixy mni'ojiiygixy. Ca' jibicpi mnijot'ajt'aditczcixy mñd ajcxy mmigüg ycixpi.

32 Hue' janchtiy oybi mhuinmáaygixipy miid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy miid co myajpatcixy ma Cristo.

5

Nej jëbi chinaaygixy yi Dios yjäy ajcxy

1 Com miich ajcxy ñipatpy nejjuhuïy Dios y'ung'ájtigixy, e Dios ooy xychojccixy xyjihuiygixy, paady copicy naychójcigixy nayjihuiygixy miñ xyipy, jadu'n nej Dios ti xychojccixy ti xyjihuiygixy.

2 Jabom jabom ma mdzinaayin naychójcigix nayjihuiygix nidüg nidüg, tim jadu'n nej Cristo xychojcm xyjihuiyim, e yjugy'ajt yejcy miid ajt nbocy ycixpi, e jadu'n Dios jäygidacy nej Cristo ytuñ.

3 Miid co miich ajcxy Dios xyjäy'ájtigixy, paady tzinaaygixy miid huädz mjot mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'ñ nijot'adii etz yi meen adzogi.

4 Miid co mDios miich ajcxy xyjäy'ajtp, paady ycixp ca' huaad mgápxcixipy ayuc huidibi tzo'ydu'ñ yejc, ni ca' huaad mgápxcixipy huidi ca' y'oyjäygidacnity, etz ni ca' huaad mguxiicixy m'anidaaccixy, com yi jibic ayuc ca' Dios jäygidägy. Tzoc yajnajxim jäygidacn ma Dios com Dios ti xyajhuaatzim ajt njot nhuinma'ñ.

5 Janch tiy'ajt jada co pinjaty tundigooyb miid huingbi töxyjäy, pinjaty jibic-huinma'ñ miid, ca'

ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meñ adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech.

⁶ Ca' mnayyéjciḡixy co jāy ajcxy xyhuin'ingixipy miiḡ ayuc huiḡibi ca' ytiy'ajtiy ca'p choubaady. Miiḡ co jāy ajcxy capxcixy ayuc huiḡibi ca' ytiy'ajtiy, paady ycixpi Dios tzaachytunañ tūg'óciy jāy ajcxy huiḡibi capxycōmidodacp yi' y'ayuc.

⁷ Ca' huaad miich ajcxy mnaymigüg'ájtigixy, ca' miiḡ mnayyōymújciḡixy yi' jadu'mbi jāy ajcxy huiḡibi ca' capxymidoogixy Dios.

⁸ Jayijp ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihuüy myajpaady ajcxy agootztuum. Jadachambi mnejhuüyḡixyp Cristo ytiy'ajt, e jadu'n nipaady nejjihuüy mdzinaayḡixy ma tūg tiicxin. Paady ycixp jatyim cuydungixyp Cristo ytiy'ajt ma yi' mdzinaayin mjugy'ajtin ajcxy, jadu'n nej jēbi huaad quēxiḡy co mmibijccixy Cristo.

⁹ Co nmiiḡd'ajtim Cristo ytiy'ajt, chi nduunim huiḡibi y'oyip, huiḡibi tudägyip, huiḡibi tiy'ajtip.

¹⁰ Ixpijccix je tiy'ajt huiḡibi Dios yjāyḡidacpy.

¹¹ Ca' miich ajcxy mnaymigüg'ájtigixy miiḡ yi' jāy ajcxy huiḡibi yajpatcixp agootztuum, huiḡibi tungixy huiḡibi Dios ca' jāyḡidägy. Miich ajcxy capxhuicix miiḡ Dios ytiy'ajt yi' ajcxy huiḡibi agootztuum tzinaayb.

¹² Tzo'yduunim ajt co jay nigapxcixy nimiydaaccixy je jibicpi huiḡibi ajcxy ytumyb ayüch ameech.

13 Co n'ixquipxim yi jadu'mbi jäy ajcxy ayuc miid Dios y'ayuc, chi niguëxigü pen janch tiy'ajt o pen ca' ytiy'ajtiy, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tücxin.

14 Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuïy mdzachmaagixyp. Jugypijccix miich ajcxy huidibi jadu'n nipaady nejjihuïy ti m'öccixy. Cristo xycodíxcixipy miid yi' ytiy'ajt.

15 Paady naygüend'ajtigixy huidibi tiy'ajt yajtungixp ma yi chinaayin. Tzinaaygix jadu'n nejjihuïy mnejhuïygixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuïygixy Cristo ytiy'ajt.

16 Ni'ixi'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjäy ytundigooygixy miid Cristo ytiy'ajt.

17 Ca' loci huinma'ñ myajtungixy, per nejhuyygixyp nej Dios tzocy co mdungixipy.

18 Ca' huaad m'ijtcixy amügy jäy, com yi jocni xyajnicxixipy ayo'nduum. Nigi oy mi'ijtcixy Dios yjhuñ ymic'ajt may'amy ma ajcxy mjet mhuinma'ñ.

19 Naymigápxigixy miñ xyipy miid yi salmo ayuc, miid yi himnos. Huin'igix Dios miid je iy huidibi je Espíritu Santo xymooygixyp. Huin'igix etz ojada-jtcix Dios cixyjot huinjot.

20 Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxii, miid tüg'ócixy ycixpi nej ndunim n'ayoohuim.

Nej huaad chinaaygixy pinjaty picychinaaygixy

21 Miid co miich ajcxy mhuindzigiy Dios, paady ycixp miich ajcxy mnayyajmij'ajtigixy mnaygapxymidoogixy miñ xyipy.

22 Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo.

23 Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi ni-huänamb yajnödögamb yi mibijcpidijc.

24 Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidoogixipy yi ñäy ajcxy.

25 Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin miid yi' ajcxy ycixpi.

26 Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzi yi mibijcpidijc ajcxy yjot yhuinma'ñ miid yi'y'ayuc etz co niibejt ajcxy miid ni.

27 Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxigiyb ma yi' yhuinduu miid huädz yjot yhuinma'ñ. Je mibijcpidijc ajcxy nipaady nej tüg nijen huidibi huädzip, ca' ma ytijy ymächity.

28 Jadu'n tzocy co je yëydijc huen tzocy jihuüy ytöxyijc tim jadu'n nej ci'm naychogyii. Yi yëydijc

huidibi tzojcp jihuiyb ytöxyijc nañ jadu'n ci'm ñaychogyii.

29 Ca' ji ni pin huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninicx, tim jadu'n nej jäy ajcxy cuend'ajtcixy yci'm ñinicx nañ tim jadu'n Cristo ycuend'ajtpy yi mibijcpidijc.

30 Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinicx.

31 Com copicy je yëydijc tzogip jihuihuip ytöxyijc jadu'n nej Cristo tzocy jihuiy yi mibijcpidijc. Paady ycixp je yëydijc ixmadzipy ytaj yteedy, e ypudigihuipy ytöxyijc, e jadu'n ajcxy chinahuipy nej jihuiy ytügajcity.

32 Ooy chachmijhuinma'ñity jada tiy'ajt huidibi yüch anajty ijtp, e yi' ñich jadu'n tijpy yi' Cristo etz je mibijcpidijc.

33 Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mjihuihuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñäy.

6

1 Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n.

2 Yi' Dios ycötujcin huidibi minaamb: "Yajmij'ajtcix mdaj mdeedy", yi' ooy ytimycopicyty. Nañ jadu'n co nguyduunim jada cötujcin, huin'it Dios jecy xyajtzinaayim.

3 Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcuyc'ajtín, e nañ jadu'n xyajtzináaygixipy jecy ya naaxhuiñ.

4 E miich ajcxy huídibi ungedeedy'ajtcixp, ca' nígoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc ytiy'ajt, jaydëbi capxymidoogixipy ajcxy Dios.

5 Miich ajcxy huídibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtín, etz yajmij'ajtcix etz tzigiiygix. Tim jadu'n nej jihuüy mgapxymidoogixy yi mHuindzin Jesucristo.

6 Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindicxcixy, e chi co je' yjihuäcni, chi nígoo mhuäccixni mdináaygixni. Tungix jadu'n nej huaad jäy ytuungixy yi huídibi mijpidaaccixp Jesucristo. Tungix cixyjot huinijot jadu'n nej Dios tzocy mdúngixipy.

7 Tumbidijc ajcxy, tungix mdung cixyjot huinijot, tim jadu'n nej jihuüy mdungixy je Huindzin Jesucristo ytung, e ca' yjäydungity.

8 Mnejhuüyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb miid tüg huindzin.

9 Miich ajcxy huídibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiüygyipy ca' mdzaachtúngixipy. Ajihuüygyixy co miich ajcxy etz nañ jadu'n

mdumbi ajcxy m̄id ajcxy mHuindzin tzajpjoty, e yi mHuindzin tzajpjotypi quipxyjaty t̄ydunañ nidüg'óciy miich ajcxy.

Je mic'ajt hūidibi je m̄ibijcp̄idijc ajcxy ypatcixyp m̄id Dios yj̄ihūiñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt m̄idity, paady jēbi miich ajcxy mbatcixy yi mmic'ajt̄in ma yi'.

¹¹ Naygohuaan̄igixy miich ajcxy ma je mujcu' m̄id t̄üg'óciy t̄iy'ajt hūidibi Dios xymooyim, hūidi m̄id naygohuaanim ma je mujcu', e jadu'n ca'yd̄i je mujcu' xym̄imadaacim m̄id an̄i. Jadu'n Dios yt̄iy'ajt nipaady nej tujt etz pujxn̄ijen hūidibi soldados ajcxy m̄id naygohuaan̄igixy tzipjoty.

¹² Hue' janchtiy xym̄idzip'ajtim poj naaxhuiñ, ca'oybi, mujcu'dijc, etz t̄üg'óciy mic'ajt m̄idp̄i hūidibi midzip'ajtp̄ Dios ya naaxhuiñ etz jiiby tzajpjoty, ca'p̄ ñch ajt nm̄idzip'ajtim naaxhuiñj̄äy.

¹³ Paady ycixp̄ yajt̄ungixy t̄üg'óciy mic'ajt etz t̄iy'ajt hūidibi Dios ti xymooygixy, jigix jēbi mm̄imadaaccixy je ca'oybi co anajty xyajtund̄igoyaan̄igixy. E jadu'n jēbi m̄imadaaccixy je ca'oybi m̄id ajcxy mm̄ibijcin. E co anajty ti mm̄imadactaaygixy, huin'it m'lj̄tcixipy mic ma ajcxy mm̄ibijcin.

¹⁴ Ca' m'ix̄tiḡihūäccix ma ajcxy yi mm̄ibijcin. Nayñi'ix̄iȳigix m̄id Dios yt̄iy'ajt, jadu'n nej j̄äy ajcxy ñayhūind̄ädzigixy co ytunaan̄igixy. Nayñi'ix̄iȳigix tim jadu'n nej soldados ajcxy ñayñi'ix̄iȳigixy m̄id pujx n̄ijen ma caach co chiptunaan̄igixy.

15 Nayñi'ixíiyigix miið Dios y'ayuc, jigix jëbi ajcxy nicxy mgapxhuäcxi Dios y'ayuc huídibi jotcuyc'ajtin yejcp. Co jadu'n mdúngxipy, jadu'n nibaadip tim jadu'n nej soldados ajcxy ñayñi'ixíiyigixy co yajtigíygixy yzapato co ytüyöyaangixy.

16 Yi' huídibi jac copicyip ca'ydi jac ni ti, mibijccix tiydudägy Jesucristo. Miið ajcxy yi mmibijcin jëbi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huídibi je soldados ajcxy yajtummyb co ñaygohuáanigix ma je tip huídibi yajnajtztibíyb miiði jün.

17 Nayñi'ixíiyigix miið Cristo ytiy'ajt huídibi miið ajcxy m'alma xyajniðzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cöjup co chiptunaangixy. Naygohuáanigix miich ajcxy miið Dios y'ayuc huídibi jadu'n nipatp nej tüg espada huídibi je Espíritu Santo ti xymooygixy.

18 Mibijctzoogix Dios miið tüg'óciy ycixpi huídibi ajcxy mdummyb. Mibijctzoogix etz pijctzoogix may'ajt ma Dios jabom jabom miið je Espíritu Santo ypubejtin. Huijy ycuyc m'ijtcixipy, ca' mjetmetzcíygixipy. Mibijctzoogix Dios miið tüg'óciy mibijcpidijc ajcxy ycixpi.

19 Nañ jadu'n mibijctzoogix Dios miið ich ycixpi, co huen xymöyich ayuc etz jotcuyc'ajtin, jigix jëbi ngapxhuäcxiwich huinmic jotmic yi' y'ayuc ytiy'ajt huídibi ca' pin jecy'ajty nejhuíygixy.

20 Dios ti xyajniðbicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyajpaadyich pujxtigoty cham.

Tungix may'ajt mibijctzoogix Dios miid ich ycixpi co xyajjotmicpigipyich jigix jebi ngapxhuacxyich yi' y'ayuc huinmic jotmic.

Capxpooxin huidibi cogixiyñip

²¹ Ooy ndzocy njihuüyich je Tiquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tiquico miich ajcxy xyajmüdmüydägipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich.

²² Nguexaamybich Tiquico ma miich ajcxy jigix jebi xymüdmüydägipy ajcxy jadu'n nej nyajpaadyich ya, e miid jada tiy'ajt jebi miich ajcxy mjotcugiiygixy.

²³ Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jebi jotcujc mdzinaaygixy, etz nañ jadu'n jebi mnaychójcigixy mnayjihuíyigixy miñ xyipy, etz jigix jebi mjacmibijccixy Cristo.

²⁴ Huen Dios may'ajt oy'ajt tunipy miid miich ajcxy huidibi yajmij'ajtcixp ajt nHuindzin Jesucristo huinixi huinitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

4190de74-18ab-52cf-ba4e-5f99ab05892f